

Tutu ña uvi ña ni ke'i San Pablo kua'an nda'a' ne ini xini Jesús, ne ndiee' ñuu Tesalónica

Ti'vi' ra cha'an' nia

1 ¹Yu'u Pablo, xiin' Silvano, xiin' Timoteo ndii, ti'vi' ndu cha'an' ndo'ó, ne ndiee' ñuu Tesalónica, ne nakayá xa'a' yuva' e' Ndiosí xiin' xa'a' xto'o e' Jesucristo. ²Na sañu'u' va na a ndo'ó, te na taxí tu a ña maní' koo xiin' ndo'.

Taxi' Pablo ña chindani Ndiosí, te ka'an tu ra ña sando'o' a ne sando'o' ne ndikún ichi' a

³Ñani ta'an' ndu, kuni a ña taxí ndu ña chindani Ndiosí sakuu' ichi' xa'a' ndo'. Xata'an saa ndu sakan', kuachi ndii kua'an ku'anu te kua'an ku'anu ña ini ndo' xini ndo' Jesús, xiin' ña ndani ta'an' ka ndo' i'in kivi' kua'an. ⁴Xa'a' a jaan' na ka'an kuation' ndu nuu' i'in ti'vi, ne nakayá xa'a' Jesús, saa kundieni ndo' nuu' sakuu' nuu' ña sando'o' ne yivi' ndo'ó, xiin' sakuu' nuu' ña xandii' nia xiin' ndo'. Te ka'an tu ndu saa vi' ini ndo' xini ndo' Jesús kii' ndo'o' ndo' sakan'.

⁵Te xa'a' a ña kundieni ndo' ña ndo'o' ndo' jaan' ndii, nia'a a ña xachuun' ndaku Ndiosí, te xata'an kundiee ndo' mii' xa'ndia chuun' a, sakan' na ndo'o' ndo' xa'a' ña jaan' vitin. ⁶Te xa'a' a ña xachuun' ndaku Ndiosí ndii, sando'o' a ne sando'o' ndo'ó jaan'. ⁷Te ndo'ó, ne ndo'o' vitin ndii, taxí a ña ndiee' ndo' xiin' ndu kii' satuví xiin' mii' xto'o e' Jesús ndee ndivi' xiin' kua'a' ángele, ña xika' nuu' nuu' a. ⁸Te kixin a tein ñu'u ndatin, te sando'o' a sakuu' ne xini yoo Ndiosí, ne ni kandixa' tu'un va'a xa'a' xto'o e' Jesucristo. ⁹Ne jaan' ndii, kundo'o' nia

ndee ndi'i' ni kivi' saa a kii' sakan', te täxi a ña kundiee nia xiin' a. Ni ndee täxi tu a kundiee nia nuu' ña ndiee' ndatun' koo' chukuu' a. ¹⁰Sakan' saa a kii' xaa kivi' ña nandiko' a jaan', te koto ka'nu' ña'a' sakuu' ne nduu' kuenta a, te nandaní tu nia kuní ña'a' nia. Te kundiee tu ndo'ó ikan' xiin' ne jaan' xa'a' a ña ini ndo' xini ndo' ña ni ndiee yu'u' ndu nuu' ndo'.

¹¹Xa'a' a jaan' na ka'an te ka'an ndu xiin' Ndiosí xa'a' ndo' te kunduu' ndo' ne xata'an xa'a' chuun ña ni kana a ndo'ó, te xiin' ña ndiee' a na saxinú a ña va'a ña kuní ndo' saa ndo', xiin' ña va'a ña xaa' ndo' xa'a' a ña ini ndo' xini ndo' Jesús. ¹²Te xiin' ña xaa' ndo' jaan' natiin xto'o e' Jesucristo ña tiin' ka'nu' ña'a' ne yivi', te natiin tu ndo'ó ña tiin ka'nu' jaan' xa'a' a ña kundani mii' Ndiosí xiin' xto'o e' Jesucristo ndo'ó.

Xi'na ka te nia'a kixin, sakan' te kixin Jesús

2 ¹Te vitin ka'an ndu xiin' ndo' xa'a' ña nandiko' xto'o e' Jesucristo xiin' xa'a' saa nata'an' e' xiin' a. Ñani ta'an' ndu, xikan' ndu nuu' ndo' ²ña täxi ndo' ña sandi'ni ne yivi' ndo'ó, ni ndee küyi'vi tu ndo' saa nia naa' ka'an nia ña ni satuví Espíritu Ndiosí nuu' nia ña xa ni kixin tukuu' xto'o e' Jesús, uun naa' ka'an ndoso' nia ña jaan', uun naa' ka'an nia ña ni natiin nia iin tutu nda'a' ndu'u' ña ka'an xa'a' ña jaan' ndii. ³Täxi ndo' kuní xa'an' ndee iin ne yivi' ndo'ó xiin' ndee ka nuu' ña xini xa'an'. Kuachi ndii, kii' kuní ka xaa kivi' jaan' ndii, xi'na ka kivi', ña nakuita tei' kua'a' va ne yivi' nuu' Ndiosí, xaa, xiin' ña tuvi te xaa' kuenta kuu' tu'un ndei' Ndiosí. Te jaan' ndii, te xa yoo ndoñu'u' xachi' nduu' ra. ⁴Kuachi ndii xikuita'nú ra nuu' sakuu' ña ka'an ne yivi' nduu' ndiosí, xiin' nuu' sakuu' ña xaka'nu' ne yivi', te ndee tixin yukun' ka'nu' Ndiosí nda'ni ra kunduu' ra, te ka'an ra ña xa Ndiosí nduu' mii' ra. ⁵Te naka'an' ndo' ña xa ni ka'an i xiin' ndo' xa'a' te jaan' kii' ni ndu'u' i tein ndo'. ⁶Xiní kaxi' ndo' ña yoo iin ña nakasi te jaan' te satuví xiin' mii' ra ndee kii' xaa kivi' ña kuní a saa ra ña jaan'. ⁷Kuachi ndii xa ni xa'a' xachuun' ña ndiee' ña ndiva'a, ña yoo si'e jaan', ndee ña kuní kundia'a ndi'i' ña nakasi ña'a' kuiti' te tuvi a. ⁸Te sakan' te tuvi te xaa' kuenta kuu' tu'un ndei' Ndiosí jaan', te xto'o e' ndii, ka'ni' ña'a' a xiin' tachi' yu'u' a, te sandoñu'u' xachi' ña'a' a xiin' ndiee' ndatun' koo' chukuu' a ña kixin xiin' a. ⁹Te kii'

tuvì te jaan' ndii, ña ndìva'a sakuiso' chuun' ña'a' te saa ra kua'a' nuu' chuun ka'nu' siki', xiin' kua'a' ña nia'á siki', xiin' kua'a' ña vixi siki' ña nandanì ne yivi'. ¹⁰Te tiin ra sakuu' nuu' ña xini xa'an' kinì va, te kunì xa'an' ra ne kua'an ichi' v'le ndiaya' xa'a' a ña nì kunì nia kandìxa' nia ña ndìxa te kaku nia nuu' kuachì nia. ¹¹Xa'a' a jaan' na tì'vi' Ndiosí iin ndiee' ña kunì xa'an' ndiee' ne jaan' te kandìxa' nia ña xini xa'an' jaan', ¹²sakan' na katun' Ndiosí sakuu' ne nì kandìxa' ña ndìxa, süu' jaan' ndii nì xtani ka nia xaa' nia ña nia'a.

Kuita ni'i e' nuu' ichi' Jesús

¹³Ndisu ndo'ó, ñanì ta'an' ndu, ne ndanì xto'o e' Jesús ndii, kunì a ña taxì naa taxi' ndu ña chindani Ndiosí xa'a' ndo', sakan' ña xa nì nakaxin a ndo'ó ndee ña nuu' te kaku ndo' xiin' ña ndiee' Espíritu Santo, ña xaa' sakan', te nduu' ndo' nditìa Ndiosí, xiin' ña inì ndo' xini ndo' ña ndìxa. ¹⁴Xa'a' a jaan' na nì kana Ndiosí ndo'ó xiin' tu'un va'a ña nì ka'an ndoso' ndu nuu' ndo' te kundiee na ndo' mii' ndatun' kaa', mii' yoo xto'o e' Jesucristo. ¹⁵Ñanì ta'an' ndu, sakan' na kuu' kuita ni'i ndo' nuu' ña nì sayá'á ndu nuu' ndo', te kaka ndaku tu ndo' nuu' a, naa' nduu' a ña nì ka'an xiin' yu'u' ndu nuu' ndo', uun naa' nduu' a ña nì ke'i ndu nuu' tutu.

¹⁶Te mii' xto'o e' Jesucristo xiin' yuva' e' Ndiosí, ña nduu' ña ndanì yoo', te nì taxì mii' a ña saki'ví a yoo' ndee ndi'i' nì kivì', te nì taxì tu a ña ndiatu' inì va'a e', ¹⁷na sandieni na tu a nimá ndo', te chindiee' tu a ndo'ó xiin' sakuu' ña va'a ña saa ndo', uun ña ka'an ndo'.

Xikán Pablo ña ka'an nia xiin' Ndiosí te kiku ka tu'un a

3 ¹Ñanì ta'an' ndu, mii' ndi'i' ndoso' yo'o' ka'an ndu xiin' ndo' ña ka'an va ndo' xiin' Ndiosí xa'a' ndu te yachì kiku tu'un va'a xa'a' xto'o e', te natiin ka'nu' ne yivi' a ndee naa nì natiin ndo'ó a. ²Te ka'an tu ndo' xiin' Ndiosí ña sakahú a ndu'u nuu' ne nia'a. Kuachì ndii süu' sakuu' ne yivi' inì xini Jesús. ³Ndisu xto'o e' ndii, xachuun' ndaku a, ña jaan' na kuu' sandieni a ndo'ó, te koto tu a ndo'ó nuu' ña ndìva'a. ⁴Te xa'a' a ña iin nduu' e' xiin' xto'o e' Jesús ndii, inì ndu ña saxinú ndo' ña nì ka'an ndu xiin' ndo', te kua'an naa kua'an ndo' ña saxinú ndo' ña jaan'. ⁵Te na chindiee' xto'o e' ndo'ó, te kundani ka

ndo' ne yivi' saa nii' ndani Ndiosí sakuu' e', te na taxí tu a ndiee' ndo', te sandieni xiin' mii' ndo' nuu' tundo'o' naa ni xandieni xiin' mií' Cristo nuu' ña ni ndo'o a.

Ka'án Pablo ña kuni a sachuun' e' te kutiakú e'

⁶Ñani ta'an' i, xiin' ña ndiee' xto'o e' Jesucristo ka'án chuun' ndu xiin' ndo' ña kusii' ndo' nuu' sakuu' ne suxan', ne ndikún ichi' Jesús, ne xika' saa ni sania'á ña'a' ndu. ⁷Kuachi ndii xiní mii' ndo'ó saa kundikun ndo' xata' ña ni xaa ndu kii' ni yoo ndu xiin' ndo', ni nduu ndu te suxan' kii' sakan'. ⁸Te ni ndee ni xaxi' so'o ndu ña'a ndee iin ne yivi', süu' jaan' ndii nduvi' xiin' ñuu ni xachuun' u'vi' ndu, sakan' ña ni kuni ndu sando'o' ndu ndee iin ndo'ó. ⁹Ni xaa ndu sakan' tee' ndee xata'an ña taxí ndo'ó ña xaxi' jaan' kaxi' ndu. Ndisu ni kuni ndu sakan' te kundikun ndo' ichi' ña ni nia'a ndu jaan'. ¹⁰Kuachi ndii sakan' tu kii' ni yoo ndu xiin' ndo' ndii, ni ka'an chuun' ndu ña naa' yoo ka küni sachuun' ndii, na küxi tu nia. ¹¹Kuachi ndii ni xini ndu kuento ña yoo sava ne suxan' tein ndo', te küni sachuun' nia ndee iin nuu' chuun, süu' jaan' ndii chi'ni' xiin' mii' nia nuu' ña xaa' tuku ne yivi' mií' kōo' kana' ña'a'. ¹²Te ne jaan' ndii, ka'án chuun' ndu xiin' nia, te kani tu ña'a' ndu kuento xa'a' a ña ni sakuiso' chuun' xto'o e' Jesucristo ndu'u, ña na sachuun' mani' nia, te kutiakú nia. ¹³Te ndo'ó, ñani ta'an' ndu, na xävi ndo' ña xaa' ndo' ña va'a.

¹⁴Saa ndo' kuenta naa' yoo sava ne küni kandixa' ña ka'án ndu nuu' tutu yo'o', te ki'in ta'an' ndo' xiin' nia, sakan' te kuka'an nuu' nia xa'a' ña xaa' nia jaan'. ¹⁵Ndisu kundasi' ña'a' ndo', süu' jaan' ndii ka'an mani' ndo' xiin' nia xa'a' a ña ne ini xini xto'o e' xiin' e' nduu' nia.

Ti'vi' Pablo cha'an' so'o' ndi'i'

¹⁶Te xto'o e', ña taxí ña mani', na taxí na ña mani' a koo xiin' sakuu' ndo' saa kivi' xiin' amaa ka. Te na koo na a xiin' sakuu' ndo'. ¹⁷Yu'u, te nduu' Pablo, ke'i i xiin' nda'a' mii' i cha'an' ndo'. Sakan' xaa' i xiin' sakuu' tutu ña ke'i i te nia'á i ña yu'u ni ke'i i a. Sakan' ke'i yu'u. ¹⁸Na sañu'u' na xto'o e' Jesucristo sakuu' ndo'ó. Sakan' na kunduu a.